

TE HENEURAA API

NENEIHIA I ROTO I TE PIHA NENEIRAA A TE EKALESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 6

Tiunu 1937.

Mat. 31.

E tena na, e au mau taeae, ia itoito outou i te Fatu, e i to'na ra puai rahi. A ahuna i te haana tama'i atoa a te Atua ra, ia tia ia outou ia patoi atu i te mau ravea paari a te diabolora. (Ephesia 6:10-11)

E tupu mai te parau mau no roto i te fenua, e hi'o mai hoi te parau tia mai te ra'i mai. (Salamo 85:11)

Te Ture Tei Vai Noa.

A hamani te Atua i te ra'i, te fenua e te mau mea atoa ra i na mahana e ono, faaea ihora Oia i ta'na ohipa i te mahana hitu, " e ua haamaitai ihora te Atua i te mahana hitu, e haamo'a atura i te reira." Te faaite maira teie parau e, hou a'e i haamauhia'i teie nei ture no to te ao nei, ua haapaohia ia e te Fatu.

Te vai ra te tahi mau faaue no to te Ekalesia ana'e, oia hoi, te ture no te haapaeraa maa i te sabati matamna o te ava'e, e te aufauraa i te moni tusia ei mono i te maa i haa-

paehia i taua mahana ra, e te haapaohia nei taua moni ra ei tusia haapaeraa aroha i te feia veve no te Ekalesia. Na to te Ekalesia ana'e taua na ture ra, e aore to rapae e faahapahia no to ratou haapao ore-raa i te reira nau ture. E mea ê râ te ture no te Sabati, ua haamo'ahia taua mahana ra no to te ao paatoa nei, eiaha te taata e to te mau puaa atoa e rave i te ohipa i te reira mahana. No reira hoi te feia parau-tia, i te mau tau atoa, i faatura'i i te Sabati.

Ua horoahia mai te ture, i to Iseraela, i te na ôraa mai e: *E tia ia oe ia haa, e ia rave i ta oe mau ohipa i na mahana e ono ra; area te mahana hitu ra, o te Sabati ia no to Atua ra no Iehova.* Ua faaetaeta roa hia teie ture i te reira tau, e o ratou tei faahapa i te reira, ua pohe roa ia. Ua itehia te hoê taata i te ohi haereraa i te raau i te Sabati, aratai atura ratou ia'na ia Mose, e ua parau maira Iehova ia Mose, *Ia tuparahi pohe roa hia taua taata*, tui ihora ratou ia'na i te ofai.

I muri mai, i te tau no to tatou Fatu, ua tuuhia maira te auraa mau i te mahana hitu, oia e, e nehenehe ia rave i te ohipa maitai e te ohipa aroha, no te mea e, ua faatiahia te Sabati no te taata, eiaha ra te taata no te Sabati. Ua horoa o Iesu i te reira ture i te ati Nephi e ua haapao atoa hoi ratou i te reira, e i teie tau hopea nei, ua parau faahou hia maira taua ture ra, no to Iseraela apî ra, area râ, aore i faaetaetahia i taua tuuraa ra.

Te tupu nei te uiraa e, "Eaha te faufaa ia faatura i te Sabati, e nafea vau e maitai a'e ai ia faatura'tu vau i te Sabati?" Teie te pahonora, maori ra, ua riro to faaturraa'tu ei faaiteraa, i te Atua, i to tatou tiaturiraa ia'na e to tatou haamana'oraa i To'na aroha ia tatou nei i te mau mahana taatoa. O te ore e haapao e faaere hia ia i te mau haamaitairaa ta te Atua, ta te Fatu, i fafau ia ratou ra, e e riro hoi to ratou mau mahana ei mau mahana oaoa ore raa.

O te faatura râ i te Sabati e o te haapao i te mau ture, e ore roa to ratou ra basileia e mou;

Papaihia e Tena Orometua.

Te Faaroo tei Faatupuhia E te Aroha.

I MUTAA ihora te parahi ra te hoê taata ona roa e te tahi taata mana tei herehia e taau taata ona ra. Ua parahi taua taata mana ra i roto i to'na aorai i nia i te hoê mou'a teitei.

Na roto i to'na aroha rahi i taua taata mana ra i tupu ai te hinaaro, o te taata ona, ia horoa'tu i te tahi tao'a aroha rahi na'na ra. No reira ua hoo oia i te hoê ofai anaana rahi, ei tao'a aroha na te taata mana ra. Ua tarahu ihora oia i te hoê taata nounou moni no te afairaa'tu i taua ofai anaana ra na te taata mana e ua horoa atoa'tu na'na e hoê tauatini tara no to'na taime. Ua pauma anaanatae atura taua taata nounou moni ra i nia i te mou'a teitei ma te mana'o e, ia horoa-tu oia i te tao'a rahi i te taata mana ra, e farii paha oia i te tahi utu'a no ta'na horoaraa. Aita a'era i maoro tae atura oia i te aua e na farerei oia i te tia i o te uputa; ua parau atura te tia i na:

Tiai: Eaha to oe tere i ô nei?

Taata nounou: Ua afai mai au i te hoê aroha na to fatu.

Tiai: No te aha oe i na reira'i?

Taata nounou: No te moni tei aufauhia mai ia'u.

Tiai: Eita roa to'u fatu e farii i te tao'a no te nounou moni.

Peapea e oto a'era hoi taua taata nounou moni ra, ho'i maira oia e faaho'i atura i te ofai anaana i te taata ona. Ua faauehia ihora te tuati, e te taata ona: "A afai atu i teie tao'a aroha i te taata mana." Ua haere oioi atura oia i nia i te mou'a e tae atura i te uputa farerei atura oia i te tia i.

Tiai: O vai oe?

Tuati: E tuati au, e ofai anaana rahi ta'u na te taata mana.

Tiai: Eita roa te taata mana e farii i te tao'a na te tuati.

Ma te māta'u e te ri'ari'a hoi, ua ho'i atura te tuati e faa-ho'i atura oia i te ofai anaana rahi i to'na fatu.

I te reira taime ua parau atura te hoê taata apî aroha i te taata ona: "Na'u e afai atu i te tao'a aroha i te taata mana." Ua parau atura te taata ona ia'na: "Ehia to oe taime?" Ua na ô maira te taata apî aroha ra ia'na: "Aita vau i hinaaro i te hoê mea; ua farerei a'enei au i te hoê tamaiti na taua taata mana ra, e ua ite au e, e taata maitai roa oia, e na roto i to raua aroha i tupu atoa'i to'u aroha rahi ia raua, e no to'u aroha rahi i te taata mana, e afai atu vau i te ofai anaana rahi ia'na ma te taime ore." I te uputa o te aorai i farerei ai oia i te tiai.

Tiai: Eaha to oe tere i ônei?

Taata apî: No to'u aroha i to fatu vau i haere mai ai.

Ua arataihia oia i roto i te piha nehenehe roa no taua taata mana ra, e ua horoa'tura oia ia'na te tao'a aroha rahi, e faatupu ihora te taata mana i te hoê tamaaraa rahi no te faaturaraa'tu i taua taata apî aroha mau ra.

Na roto i teie nei aamu i ite papu roa'i tatou e, e AROHA mau e te FAAROO hoi tei faatupuhia e Iesu Mesia. E na roto i To'na aroha rahi no te mau taata atoa e na roto i To'na FAASATAURORAAHIA, e te TARAEHARA hoi, e na roto i Ta'na FAA-RÊ-RAA i te pohe i faaitohia'i e Ana, i to te Atua Aroha hope ore; e ua faatupu atoahia, e Ana, to ta tou hiaai mau ia haamori atu i te Atua.

E tai'o tatou i te parau ta te Aposetolo ra o Paulo i faaitu atu i te ati Galatia: I te Mesia nei hoi ia Iesu, aore o te peritome faufaa, aore hoi to peritome ore. O te faaroo ra e faatupu i te hinaaro ra. (Galatia 5:6.) O TE FAAROO IA TEI FAATUPUHIA E TE AROHA.

Papaih a e Goladena Make, Orometua,

EDITORIALE

THOMAS L. WOODBURY.

GENESE 49:22-26.

" 48:15-19.

DEUTERONOMI 33:16.

ALAMA 63:4-9.

ALAMA 10:3.

MOSIA 10:16.

3 NEPHI 15:21-24.

E Fetii te Taata Maohi e te Initia.

HOE â huaai te Initia e te mau taata tei parahi i ô nei, i Samoa, Hawaii, Niu Zelani, Tonga e e rave rahi atu â te mau fenua moana. *Eaha te ravea i tae mai ai taua nunaa taata ra i teie nei mau vahi ra? E tai'o maite i te parau i pa-paihia i roto i te Alama, pene 63, irava 4-9.*

Tei te toru ahuru e te hitu o te matahiti i te tavanaraa o te mau haava i faarue ai te tahi tiaa rahi taata i te fenua ra ia Zarahemela, oia hoi e pae tausani e maha hanere taata, e ta ratou mau vahine e te mau tamarii, haere atura i te fenua i apatoerau ra. E taata iimi noa o Hagota, i huere ai oia e i hamani ai i te hoê pahi rahi i te hitu o te fenua ra i Bounetifula ra, i pihaiiho i te fenua ra i Desolationa, e ua tuu atura i te tai i te tooâ o te râ i pihai a'e i te fenua iti rairai e tae atu ai i te fenua i apatoerau ra. E inaha, e rave rahi o te mau taata o te ati Nephi tei tomo i roto ra, e reva'tura ma te mau huru maa e rave rahi, e na vahine e rave rahi, e te tamarii hoi, e fano tia'tura ratou i apatoerau. E hope a'era te toru ahuru e te hitu o te matahiti. E i te matahiti e toru ahuru ma vau i hamani ai taua taata nei i te tahi atu â mau pahi. E ua ho'i maira te pahi matamua, e tomo atura e vetahi mau taata e rave rahi i te reira; e rave ihora ratou i te mau huru maa e rave rahi, e tere faahou atura i te fenua i te pae apatoerau ra. E aita'tura ratou i itea-faahoa-hia. Te mana'o ra matou, ua paremo ihora ratou i raro i te tai. E fano

atura tetahi â pahi, e te vahi i haerehia e ana ra, aita matou i ite.

Te parau atu nei au e, o taua mau taata ra, o tei tere na te moana e aita i ho'i atu i te fenua America, i te anotau no Hagota, taata hamani pahi, o te Hui Tupuna ia no te mau ui o te noho nei, i te mau fenua, e te mau motu hoi o teie nei pae-au fenua. E fetii tatou atoa e no roto mai ia i te opu no Ise-raela.

O Lehi ma, tei tere atu i te tufaa fenua i maitihia, e Iehova, ei faaearaa no ratou, no roto mai ratou i te opu o Iosepha, tei hoohia e to'na mau taeae e tei parahi i Aiphiti. A tai'o te II Nephi, pene 3 taatoa.

Te na ô maira te peropheta i roto i na irava 22 e te 23: *E tau tamaiti e Iosepha e, . . . no te reira faufaa e haamaitaiahia'i oe: E ORE HOI TO OE RA HUA AI E PAU.*

Te mau haapiiraa a te mau hui tupuna, i te anotau matamua ra, ua au papu roa ia i teie nau papairaa mo'a.

NO TE AMUIRAA.

I TE mau mahana matamua no Eperera, ua tairuru mai te mau taata i na vahi e maha no te Amuiraa Ekalesia.

TUBUAI.— I reira te putuputuraa rahi. Ua i roa te Fare Pureraa e aita hoi e parahiraa to te tahi pae taata. Ua ito-ito roa te nunaa taata e ua mauruuru ratou atoa no tana amuiraa ra, e ua hau te maitai te ohipa a te Feia Api. Ua bape-tizohia na taata e too pae, ua haamaitaiahia te tahi mau tamarii e ua faatoro'ahia te tahi mau taeae i roto i te Antahu'araa.

AMANU.— I reira atoa te tahi Amuiraa. Ua amui mai te taata no te tahi atu â mau fenua, oaoa atura te Ekalesia no te mau parau maitatai i haapiihia ra.

PAPEETE.— Ua mauruuru te taata i Tahiti noa'tu e ai-

ta ratou i rahi. Area, tei ia ratou te Varua o te Atua, e ua tauturu maitaihia ratou i roto i te mau putuputuraa ra.

TAKAROA.— E mau mahana popou ia no te nunaa taa-ta i tairuru mai no te mau fenua Tuamotu. I reira na Orometua e hoê ahuru aore, e ua parahi ratou i te fare o Heia e te tahi pae i te fare Orometua. Ua bapetizohia e toru taata, ua haamaitaihia te aiu a Taumata e ua faatoroahia na taata e hoê ahuru ma pae. Ua hau te maitai te mau haapiiraa ho-ho'a, te arearearaa o te Feia Apî e te mau ohipa i te haapao maitaihia. Te mahana hopea, e mahana rahi ia no te taata paatoa, ua faatamaa to Takaroa i te hui taaata, i te puaatoro tupai, te puaa maohi, te i'a e te mau huru maa i hinaarohia; ia paia ratou, reva'tura te tahi pae o ratou e i muri a'e ra te toe ia.

Maururu.

TE PARAU AUTU'ARAA.

Tihoti M. LAKE.
Beniamina WINKEL,
Levi LEATHAM.
Eledona MORTENSEN.

TE BUKA a MOROMONA.

Haapiiraa no te Ava'e TIURAI 1937.

Salamo 85:10-13. Te parau no roto mai i te fenua.

Isaia 29:1-15. E Buka ua piahia te api.

Ezekiela 37:15-21. Na parau e piti, hoê na Iuda e te tahi na Iosepha.

Ioane 10:16. Te mau taata ati Nephi ra.

III Nephi 15-24. E parau tauturu.

II Nephi 5:29-30. Te mau Api metalo.

" 27:6-26. Te parau tohu no te Buka a Moromona.

Moroni pene 8 e te 9. E hunahia te Parau.

III Nephi 16:4-14. E tae mai te Parau mau i te Tau hopea nei.

II Nephi pene 29. E na o mai te Etene, e Bibilia ta matou.

E te Autahu'araa e te mau taeae, a tai'o maite i teie nei mau papairaa i roto i te Bibilia e a faaau maite taua mau parau ra i te pueraa parau i roto i te Buka a Moromona, e mea faito ia e e mea tano hoi ia tamau te feia toroa i te reira.

Na Te Mau Maapii

Mahaere na te mau utuafare,

3. Te faaroo nei matou e, no te taraehara a te Mesia ra e ora'i te taata atoa o tei haapao i te mau ture e te mau faaue-raa o te Evanelia nei. Te parau tohu a Isaia, i te pene 53 i muri a'e ia te tupu tano roa raa. Ohipa 4:10-12: Roma 5:12-20; I Korinetia 15:20-24; I Ioane 1:8-9.

E haapiiraa hoi teie mau irava no te mau pupu utuafare, ia ite papu te mau taata i te mau ohipa maitai rahi ta te Mesia i rave no te taata nei.

TE SOTAIETE VAHINE TAUTURU.

MAUDE WOODBURY.
NOROTA HARDY,
TOTARE GREEN.
IOSEPHA G. STEVENS

Te Haamana'oraa Metua Vahine.

Parau tumu Rula 1:16.

E ia tae mai taua mahana haamana'oraa ra, e haapao te taata o te ao nei i te faatura raa maitai o te mau Metua vahine e ora ra. E mahana ra-

hi roa ia no te mau haapaoraa atoa e e rave rahi atu â te mau mea te tia ia ravehia.

Ia herehia to tatou mau Mama no te mau ohipa maitai tei rave pinepine hia, e ratou, no te tamarii; ua faito ore to ratou aroha rahi no ta ratou huaai tamarii ra.

E mea au paha te tahi haapiiraa hoho'a i te po Sabati, no reira e tauturu tatou atoa ia mauruuru e ia maitai to ratouparahiraa roa i te fenua nei.

Haapiiraa no te Ava'e Tiurai.

MAHANA MAHA MATAMUA.

HAPIIRAA EVNELIA E TE IRITIRAA MANA'O.

Deut. 30:1-5; Isaia 5:25-19: 11:11-12: 14:1-2.

Isaia 43:5-7; Ieremia 3:12-15-18; 16;14-16: 23:2-4.7.8.

Ieremia 31:7-12; Mataio 15;24; Mica 4:1-2.

E horoa'tu i teie nei mau irava i te mau tuahine, e na ratou e faaite mai i to ratou mau mana'o. E faairi i teie haaputuputuraa ra o Iseraela ei iritira mana'o no te Sotaiete paatoa.

MAHANA MAHA PITI,

Te BUKA A MOROMONA.

E parau tauturu no te haaputuputuraa o Iseraela. E faaitoito te mau tuahine ia ite papu ratou te parau i papaihia i roto i teie mau irava:

I Nephi 10:14: II Nephi 6:11: 9;2; 10:7; 30:7-8; Iakoba 6:2;

III Nephi 5:26: 20:29-34: 21:1, 21, 26-29.

MAHANA MAHA TORU.

Ia haere te mau tuahine i te utuafare e ia haapii ratou i te parau no te hoê taata no Samaria i to'na haerea. Luka 10:25-38.

E haamaitai i tei veve, tei mauini e tei ere i te faufaa, e faaitoito atoa atoa ra te mau melo o te Sotaiete i taua mahana ra.

MAHANA MAHA HOPEA.

E haapii i te Ture fenua ia ite papu i taua mau ture ra. E tauturu hoi i te hui tamarii.

NA TE MAU TUAMINE

Te hinaaro nei matou ia vai mau â, i teie pae o te ao, te hoê Sotaiete Tuahine Tauturu. Te taa nei ia matou ua ore te anaanatae o te mau tuahine, no te tahi mau Amaa, i ta ratou ohipa, e mai te mea aita â te Sotaiete i pohe, e mea paruparu roa te mau putuputuraa.

E ere au i te mea maua no nia i te ohipa o te Sotaiete Tauturu, mai tei faaterehia i Siona; area ra, e piti noa iho ava'e to'u parahiraa i teie nei mau motu nehenehe, e aita â vau i ite i te mea tei au no te tautururaa'tu ia outou. Te hinaaro nei anei outou ia tahoê tatou no te paturaa e te haamaitairaa i ta tatou Sotaiete.

E tau mau tuahine, a haere e farerei i te Faatere o to outou mau Amaa, a faaite atu i to outou mau mana'o, i nia i taua vahi ra, e na ratou ia e faatae mai i te reira ia'u.

Te tia nei to tatou Peretiteni rahi, o Sister Robison, ia papai atu vau ia'na no te faaiteraa'tu i te ohipa i ravehia. Hou to'u na reira raa, te hinaaro nei au ia faaroo i te parau a te mau melo no te mau amaa.

Ua haere a'e nei au, e o Toma Woodbury Peretiteni, i te Amuiraa Eperera, i Takaroa, e ua faatupu matou i te hoê putuputuraa nehenehe roa no te Sotaiete Vahine tauturu; e 138 tuahine tei tae mai, no na Amaa e pae ra.

A faaitoito ana'e tatou. A faateitei ana'e tatou i te reva i faatiahia no teie ohipa rahi na te mau vahine.

I roto i to tatou tiaraa Metua vahine, no te mau tamarii, e mea tia ia noaa mai, ia tatou, te mau haapiiraa i tuuhia mai e to tatou mau taata faatere. *E hinaaro anei outou e tauturu ia'u ia faatae mai te anaanatae i roto i to tatou mau putuputuraa, e ia riro ei haapiiraa mau te tia ia haamaitaia?*

HAAPIIRAA SABATI.

Goladena W. MACK.
 Teneta A. WILDE.
 Anderea N. MACHEN.

HAAPIIRAA NO TE AVA'E TIURAI.

Na te Pupu 3 e te Pupu 4.

Irava tamau aau Mosia 2:17.

Haapiiraa:

Sabati matamua: Mosia pene 1 e te 2.

" piti:	" "	3 e te 4.
" toru	" "	5 e te 6.
" maha	" "	7 e te 8,
" pae.		Hi'opoaraa.

Na te Pupu Piti.

Te mau irava no te Haapii hahae utuafare. A hi'o i te ve'a no Tiuna.
 TE MAU PARAU NO TE TARAEHARA.

Te Paraimere.

1. Te poheraa e te faaoraraahia o Lazaro. Ioane 11:1-47.
2. Te tia faahouraa o te Mesia. Mataio 28:1-10; Mareko 16:1-13.
 Luka 24:1-12; Ioane 20:1-8.
3. Ua faaite Iesu ia'na iho. Ioane 21:1-17.
4. Hi'opoaraa.

Parau tamau aau: E mana tei ia Iesu i nia i te pohe, no reira to'na tia-faahou-raa.

Himene: Te hinaaro nei Iesu ia'u ei hihi mahana. Hime-
 ne numera 136.

HAAPIIRAA NA TE FEIA API.

TENA PALMER.

NOELA. C. DEVEY.

VERANONA C. THURGOOD.

HAURATA HEUSSER.

Mau Haapiiraa No te Ava'e TIURAL.

Te Sabati matamua: Na te mau Tuahine o te Feia Apî.

E imi maite ratou i te tahi mau parau, e te himene hoi, o te au i te mau taata atoa, ia haaputuputu mai ratou i taua po Sabati ra.

Te piti o te Sabati: Na te mau taeae Apî ia.

Mai te ohipa maitai i itehia i te amuiraa i te Sabati matamua, e na reira atoa te mau Taeae Apî. E tamata outou ia hau ta outou mau ohipa i te maitai.

Te toru o te Sabati: Na te mau Tamarîi o te Praimere.

E faaite mai ratou i te ohipa i haapiihia e ratou no nia i te Bapetizoraa tamarîi, mai tei neneihia i roto i teie nei ve'a.

Te maha o te Sabati: E Amuiraa ia.

E amui mai te mau Feia Apî e te mau tamarîi no te Praimere, e e faaitoito rotou i te faaite i te tahi mau parau e te himene maitai, no te faaanaanataeraa i te mau taata te tairuru mai no te faaroora i te parau maitai.

TE PRAIMERE

Robeta M. JOHNSON.

Hénere C. TEEPLES.

Rarefa R. TAYLOR.

Pereti B. ASAY.

TE TAMAITI HAAPAO ORE.

A pii ai to'na mama ia haere mai e tamaa, te heru noa ra o TIMI i ta'na aua tiare. Ua poia roa oia, no reira ua horoi ru noa oia i to'na nau rima,

HAAPIIRAA.

1. MAREKO 16:16. (FAAROO)
2. OHIPA 2:38. (TATARAHAPA)
3. MORONI pene 8. (BUKA a MOROMONA)
4. III NEPHI 12:18 e tae noa'tu i te hopea.

MAU PARAU NO TE BAPETIZORAA.

E haapii papu i taua mau parau ra i na mahana maha matamua o te ava'e Tiurai. Ia tae i te mahana maha hopea o te ava'e ra, e haapii ratou i te tahi arearea maitai.

E mea maitai anei ia faaroo te aiu nainai i te parau no te Bapetizoraa? E mea tia anei ia tatarahapa te aiu? E hara anei ta'na? Eaha te tau e au maitai ia bapetizohia te tamarii? Te na ô maira te. Buka Fafau, i te pene 68:27; *E bapetizohia ta ratou mau tamarii no te faaoreraa i ta ratou mau hara, ia tae i te vau o to ratou matakiti, e ia farii mai i te tuuraa rima.*

TE PRAIMERE.

O te ohipa o te Praimere tei hau i te maitai, no te mea te rahiraa o to ratou oraraa, tei mua ia ia ratou. A hi'o i te mau parau maitai na ratou tei neneihia e teie nei ve'a numera hoê.

Teie te hinaaro o te mau Orometua, ia haaputuputu te mau tamarii i te mau hepetoma atoa, i te mahana maha, i te hora 9 i te po'ipo'i, e i reira ratou e haapii ai i teie nei mau irava, e e haapii atoa ratou i te tahi mau ohipa arearea api, ia itoitoto to ratou mau tino atoa ra. E faaitoitoto raua ia tupu etaeta te tino e ia maramarama te feruriraa mana'o; ia papu te mana'o e ia itoitoto te tino, e mea nehenehe ia te tupuraa o te tamarii.

i nia i te iri tamaaraa ua hi'o to'na mama ia'na e ua parau atura: e Timi aita to oe na rima i mâ maitai. Faatoro atura o Timi i to'na na rima e na ô atura: A hi'o na, ua mâ maitai o roto mai, e aita vau e rave o rapae au mai no te amuraa i te maa.

Ua parau atura te mama o Timi: Ua fiu roa vau i te parauraa ia oe, a horoi ia oe i te pape. Eaha, aita oe e au ia mâ oe? Pahono atura o Timi: E mea fiu roa, te mau po'ipo'i e te mau ahiahi atoa, na mua i te mau tamaaraa atoa, ia horohoroi i te pape, e taime rahi te mau'a. Na ô atura to'na mama: Atira ia i teie nei, a haapao i to oe hinaaro, e horohoroi oe ia oe i te taime ta oe e hinaaro.

I reira ua rahi roa'tura te taime ta Timi i haapau i roto i te 'aua tiare, e ua iti roa i te horoiraa ia'na, e ua mauruuru oia ia hi'o ô to'na mama i te mau taime tamaaraa.

I te mahana i muri iho ua faatupu to'na mau hoa i te hoê arearearaa na ratou e ua faaoromai noa oia i te tia i raa ia ahiahi. Ua hauti noa oia, i te po'ipo'i, e tana uri e i te heru raa i te to'e repo, e i te hora tamaaraa, ua faarari noa oia i to'na rima i te pape toetoe. Ua tunu to'na mama i te hue-ro moa e te hamu e te momona atoa; amu i hora o Timi ma te oaoa, e no to'na ru ia haere i te arearea, aita oia i horoi i to'na utu i te tauera.

I te vahi arearea raa te vai ra te mau iore uouo, te piifare fanaua e te rapiti, e te hoo atoa hia ra te rimona, te to papaa e te monamona. Te vai atoa ra te hoê haruraa pute. Te arearea noa ra o Timi a faaroo ai oia i te hoê tamaiti, o Samu to'na i'oa, i te parauraa: Te vai a'era te hoê afata aita e hoê mea i roto, teihea a'enei to tatou taata oviri no Borneo?

Na ô atoa'tura te tahi reo: Hey, o oe! A faaea oe i roto i to oe afata e oti noa a'e te arearea raa, e i reira oe e amu ai. Fariu atura Timi, ma te i te vaha i te monamona, ia ite e, o vai teie paraubia nei, e aita oia i ite i te hoê tamarii i muri ia'na. Ata i hora o Timi e na ô atura: Mai te mea o vau ta outou e parau nei, aita vau i roto i te haamaamaa raa. Eaha te reira mana'o i tupu ai ia outou?

Na ô maira te tabi tamaiti: Ua hape vau. Parau atura o Samu. A haere mai oe e Timi, a rave i te reira tufaa, a mana'o oe e, aita to matou taata oviri i tae mai. No reira ua haamehameha o Timi i te mau tamarii e ua hauti noa oia i to'na nau rima mai te hoê uri taata e riro atura oia ei arearea na te taatoaraa.

I to'na ho'iraa i te fare i te ahiahi ua hi'o oia ia'na iho i roto i te hi'o, e te atura oia i to'na rouru tei taffi noa, to'na ahu motumotu e to'na mata tei paraihia i te monamona: i reira rave atura oia i te mea te rave ô hia na e outou, oia hoi, ua horoi maitai oia ia'na iho no te tamaaraa ahiahi.

Teie mau haaputuputuraa, no te tamarii i raro a'e i te matahiti e 12.

Te hinaaro nei matou ia maitihia te tahi tuahine ite ei aratai no ratou e ia faaite papu ratou, i te haamataraa o teie nei ohipa, te vitiviti o teie haapiiraa a te mau tamarii api.

TE PAUMA.

To'u pauma, mai te manu nehenehe te huru,
I te tereraa'tu i te ra'i.
Ia tapu vau i te taura pauma,
Ei hea tau manu e mau e ai?

E Uri Maramarama.

I te hoê po'ipo'i ua anihia, na roto i te niunia paraparau, te taata ra o Mr. F. F. CAVE e te taote ra o Dr. J. W. HULL, no te faaiteraa'tu e, ua tarahu ta'na uri i te fare ma'i na'na ra.

Ua faaite atoa'tura te taote e, i to'na taeraa i ta'na piha ohiparaa, i taua po'ipo'i ra, te tiai noa ra te uri ia'na, e i to'na tomoraa i roto ua pee atu te uri na muri ia'na ma te teitei, Ua vaiho noa te uri ia hi'opoa te taote ia'na e ite atura te taote e, ua puta te avae aui no muri i te hoê ofai pupuhi,

Ua rapaau atura te taote i te puta e ua haere te uri ma te tairiiri i to'na aero, e e piti hora i muri iho ua ho'i oia ia rapaau hia to'na avae. Haere atura oia i rapae mai te matamua ra e aita i maoro i muri iho ua ho'i faahou mai oia, e aita oia i haere i rapae maori ra ua rapaauhia to'na puta.

Ua ite te taote i taua uri ra, no reira oia i taniuniu atu ai i to'na fatu ia ore oia ia hitimahuta ia tae atu te parau titaaraa. Ua haere a'enei taua uri ra i roto i taua fare ma'i ra, a rapaauhia'i te tahi mau puaahorofenua, no reira ua taa maitai ia'na te vahi e haere, ia hinaarohia te taote.

TE HAUTIRAA.

Faahororaa raau, e horoi e a ore ra e anani.

E tapea te orometua e piti raau i roto i to'na rima, e e maiti oia i na pūpū e piti e to ratou aratai; e i reira e panai na pūpū e piti, hoê i te tahi

pae e te tahi i te tahi pae, e ia parau te orometua, e horo mai na aratai e haru i te raau, no te horoaraa'tu i te tahi o to'na mau taata o te faaho'i atu i te reira i te orometua, e e na reira e tae noa'tu ie paura o te taata, e te pūpū tei hope i te horo na mua, tei ia'na ia te rê.

TE' MAU PARAU API

I te ava'e no Eperera i mairi a'enei, ua tae mai na Orometua apî, oia hoi, o ELETONA Mortensen e o HAURATA Heusser,

E i teie ava'e o Tiunu e tae faahou mai e piti na Orometua apî, oia hoi, o JOSEPHA G. Stevens raua a PERETI Boyce Asay.

I te 5 no Me i mairi a'enei ua pohe roa, i Takaroa, to tatou taeae o HURI a HURI; oia te tauturu hoê ho te peretiteniraa o te Feia Apî, no taua Amaa ra, e ua rave itoito oia i ta'na ohipa e tae noa'tu i to'na poheraa.

I te 27 no Me i mairi a'enei, ua tanuhia, i Papeete nei, te taata ra o Edouard TERIRE, e te tumu i pohe ai oia, ua tairihia to'na upoo, i te auri coropa, i roto i te hoê inuraa ava tei tupu i Papara.

I te 21 no Me i mairi a'enei ua iri te pahi ra o TOOYA i nia i te aan i te motu ra i Tikehau e ua ho'i mai i Papeete nei. Ua afaihia oia i nia i te tavieriaa ia hi'ohia te mau vahi i ino haere e ua iteahia e ino rahi to te pahi no reira e tatai rii noahia i onei ia tia ia'na ia tere i te tahi fenua, no te hamani roaraa ia'na e e pau e toru ava'e ma te tere ore na te Tuamotu.

I e oire ra o Newark, New-Jersey, America. ua tupu te hoê ohipa mae-re mau, oia hoi; Ua noaa te ite papu i te hoê taata e, e pohe oia i te hopea o te hepetoma, no reira, faaite atura i ta'na tamaiti e pohe oia i te hopea o te hepetoma, hoo atura i to'na iho afata, faaau atura i te mau mea atoa no to'na tanuraa e te mau taata na ratou te a'oraa, aufau atura i ta'na mau tarahu atoa, hoo atura te mau tiare e to'na vahi i roto te aua tanuraa ra, i te mahana pae ua farerei oia i te hoê hoa na'na ra e i to raua taa raa, ua aroha oia ia'na ma te parau atu e, eita oe e ite faahou ia'u i te oraraa nei; haere atura oia i te fare e i te mahana maa pohe roa'tura oia, ua motu te hoê uua pamu toto i roto i to'na upoo.

Louis Drollet Gérant

Thomas L. Woodbury Imprimeur.

Rue Dumont d'Urville, Orovini, Papeete, Tahiti.